

# REALISTIK PARAMETER INTERAKSI SOSIAL DALAM HUBUNGAN MUSLIM DAN BUKAN MUSLIM DI MALAYSIA BERASASKAN MAQASID SYARIAH

## *REALISTIC PARAMETERS OF SOCIAL INTERACTION IN THE RELATIONSHIP BETWEEN MUSLIMS AND NON-MUSLIMS IN MALAYSIA BASED ON MAQASID SHARIAH*

Azarudin Awang<sup>1\*</sup>  
Azman Che Mat<sup>2</sup>

<sup>1</sup>Akademi Pengajian Islam Kontemporari, Kampus Terengganu, Cawangan Dungun  
(E-mail: azaru154@uitm.edu.my) (Corresponding Author)

<sup>2</sup>Akademi Pengajian Bahasa, Kampus Terengganu, Cawangan Dungun  
(E-mail: azman531@uitm.edu.my)

### Article history

**Received date** : 26-8-2024  
**Revised date** : 27-8-2024  
**Accepted date** : 28-9-2024  
**Published date** : 30-9-2024

### To cite this document:

Awang, A., & Che Mat, A. (2024). Realistik parameter interaksi sosial dalam hubungan muslim dan bukan muslim di Malaysia berasaskan *Maqasid Syariah*. *Journal of Islamic, Social, Economics and Development (JISED)*, 9 (66), 413 – 422.

**Abstrak:** *Kehidupan manusia kerap kali dihadapkan dengan pelbagai kerencaman fenomena pluraliti. Manusia juga merupakan makhluk sosial yang cenderung memperkenalkan dirinya sendiri dan dalam masa yang sama cuba mengetahui perbezaan yang ada pada orang lain melalui interaksi. Interaksi sosial merupakan satu hubungan yang berlaku antara manusia dengan manusia yang lain, sama ada bersifat individu ataupun kelompok. Dalam melestarikan keutuhan akidah, interaksi sosial yang berlangsung antara Muslim dan non-Muslim sewajarnya diasaskan kepada satu parameter berlandaskan maqasid syariah. Justeru, objektif kajian ini ialah melihat realistik parameter interaksi sosial dalam menjalinkan hubungan Muslim dengan non-Muslim di Malaysia. Kajian ini menggunakan kaedah kualitatif iaitu penelitian dilakukan ke atas artikel-artikel yang menyentuh isu agama yang melatari hubungan kedua belah pihak dan implikasi sekiranya pemahaman kabur dalam kalangan Muslim terhadap interaksi sosial merentas agama. Hasil kajian mendapati, bahawa terdapat larangan menjalinkan interaksi sosial khususnya dalam meraikan upacara keagamaan orang lain atau bersifat tasyabbuh. Manakala terdapat pandangan adanya kewajaran batasan 'do' dan 'don't' dalam interaksi sosial Muslim dengan non-Muslim di Malaysia khususnya apabila melibatkan sambutan perayaan dan kebudayaan. Kajian ini penting kerana ia memberi maklumat awal kepada penyelidik untuk membangunkan satu parameter interaksi sosial dalam hubungan Muslim dan bukan Muslim di Malaysia berasaskan maqasid syariah*

**Kata kunci:** *Parameter, Interaksi Sosial, Muslim, non-Muslim, Maqasid Syariah*

**Abstract:** *Human life is often confronted with various complexities of pluralistic phenomena. Humans, as social beings, tend to introduce themselves while simultaneously trying to understand the differences in others through interaction. Social interaction is a relationship*

*that occurs between one person and another, either individually or in groups. In preserving the integrity of the Islamic creed, the social interactions between Muslims and non-Muslims should be based on a parameter grounded in maqasid syariah. Therefore, the objective of this study is to examine the realistic parameters of social interaction in fostering relationships between Muslims and non-Muslims in Malaysia. This study employs a qualitative method by analyzing articles that discuss religious issues affecting the relationship between the two groups, as well as the implications of blurred understanding among Muslims regarding interfaith social interactions. The findings reveal prohibitions against certain types of social interaction, particularly in participating in religious ceremonies of others or in adopting tasyabbuh (imitation). Moreover, the study suggests that there are appropriate limits of "do's" and "don'ts" in social interactions between Muslims and non-Muslims in Malaysia, especially concerning religious celebrations and cultural practices. This study is crucial as it provides preliminary information for researchers to develop a parameter of social interaction in Muslim and non-Muslim relations in Malaysia based on Maqasid Syariah.*

**Keywords:** *Parameters, Social Interaction, Muslim, Non-Muslim, Maqasid Syariah*

## **Pendahuluan**

Dinamikanya Malaysia ialah ia merupakan sebuah negara multietnik yang terdiri daripada pelbagai anutan agama dan kepercayaan. Kepelembagaan ini menjadikan interaksi sosial dalam kalangan etnik-etnik sedikit mencabar khususnya apabila melibatkan isu-isu yang menyentuh keagamaan. Interaksi sosial merupakan satu bentuk hubungan yang lazim berlaku dalam kehidupan manusia. Perkembangan sosial seseorang banyak sekali dipengaruhi oleh faktor keluarga dan persekitaran hidup sekeliling. Kepelembagaan etnik, agama dan budaya yang wujud di Malaysia boleh menatijahkan dua keadaan iaitu kedamaian atau konflik. Justeru, bagi memelihara keharmonian agama dan kaum di Malaysia, ia memerlukan satu usaha yang jitu dan bersungguh-sungguh daripada semua lapisan penganut agama.

## **Penyataan Masalah**

Salihah Ali et al. (2021) menyatakan bahawa muncul polemik baru dan suasana 'murung' dalam hubungan antara sesama Muslim dan antara bukan Muslim apabila ada dalam kalangan umat Islam meraikan perayaan dan kebudayaan bukan Islam. Nur Farhana dan Nur Syariah (2020) menyatakan komuniti Muslim yang terlibat meraikan perayaan dan kebudayaan bukan Muslim kadang kala berhadapan dengan hubungan tegang dan tidak membina yang akhirnya boleh menyebabkan putusannya hubungan dan pelbagai stigma buruk diberikan. Sebagai contoh, kelompok yang baru memeluk Islam berhadapan dilemma dengan dipulau dan dipandang serong oleh komuniti asal kerana muafak meninggalkan sepenuhnya sambutan perayaan dan kebudayaan asal tradisi yang diwarisi dari leluhur sejak sekian lama lagi. Penglibatan umat Islam dari pelbagai peringkat masyarakat bagi tujuan menyantuni kelompok non-Muslim dengan meraikan perayaan dan kebudayaan bukan Muslim secara semberono akan merosakkan akidah mereka. Antara tindakan tersebut adalah bersama-sama menyanyikan lagu kebesaran agama mereka, memberi ucapan membesarkan hari kebesaran keagamaan, mengikuti ritual, menunaikan hak-hak kemanusiaan rentas agama dan sebagainya. Ini dibuktikan apabila terdapat beberapa penuntut Universiti Islam Antarabangsa Malaysia (UIA) Gombak yang turut serta membersihkan kuil Hindu di Taman Kelang Utama, Klang, Selangor disifatkan sebagai perkara yang membawa kepada pemosongan akidah (Zuhaini, 2021).

Mengambil kira akidah merupakan asas kepada kesucian agama Islam, penyelewengan yang berlaku sama ada dari aspek amalan, kepercayaan dan keyakinan akan meruntuhkan agama seseorang Muslim. Justeru, mufti Perlis menyatakan bahawa menghadiri dan turut serta melakukan upacara perayaan keagamaan bukan Muslim adalah tidak dibenarkan sama sekali kerana ia berkaitan dengan amalan ritual agama bukan Islam ataupun tasyabbuh yang dilarang iaitu menyerupai amalan agama selain Islam (<https://muftiperlis.gov.my/>, 2019). Terkini, kerajaan Johor telah mengeluarkan fatwa yang secara umumnya mengharamkan umat Islam terlibat dalam perayaan dan kebudayaan bukan Muslim. Namun, terdapat sebahagian daripada ulama berpandangan hukum meraikan undangan atau jemputan ke majlis sempena perayaan dan kebudayaan bukan Islam tanpa upacara ritual keagamaan adalah harus dan dibenarkan (Mohd Rus & Zulfaqr, 2017). Kekeliruan untuk melibatkan diri dalam meraikan perayaan dan kebudayaan bukan Muslim dan kurangnya pengetahuan tentang parameter yang perlu diikuti bukan sahaja timbul dalam kalangan masyarakat Muslim asal, malah kekeliruan ini juga timbul apabila kelompok-kelompok yang baru memeluk agama Islam. Mualaf tidak dapat membezakan sama sekali amalan yang bersifat budaya yang diharuskan dan amalan agama yang diharamkan oleh agama Islam khususnya apabila mereka dijemput meraikan bersama ahli keluarga asal upacara-upacara perayaan dan kebudayaan asal seperti hari natal, pesta ponggal, thaipusam, sambutan tahun baru Cina dan sebagainya. Justeru, mufti negeri Johor mencadangkan agar satu parameter perlu dibangunkan sebagai panduan kepada umat Islam di negara ini melibatkan diri dalam perihal yang berkait dengan perayaan dan budaya agama bukan Muslim di Malaysia (Salihah Ali et al., 2021)).

Oleh kerana Malaysia merupakan sebuah negara yang didiami oleh masyarakat madani pelbagai etnik. Kemakmuran dan keamanan amat yang dikecapi berkait dengan perpaduan kaum. Perihal ini diserlahkan melalui aktiviti ziarah, makan bersama ketika menyambut perayaan dan berkongsi meraikan kebudayaan. Bagi umat Islam, amatlah wajar satu parameter dibangunkan bagi memastikan agama mereka sentiasa terpelihara ketika menyambut perayaan dan kebudayaan orang lain. Tanpa pengetahuan dan pemahaman yang jelas terhadap batasan yang boleh diraikan oleh agama, nescaya prasangka dan salah faham akan berlanjutan. Justeru, kajian tentang parameter ini signifikan dengan elemen masyarakat Malaysia madani kerana ia mampu merungkai permasalahan yang menjadi titik halangan dalam hubungan antara agama berdasarkan maqasid syariah dan dalam masa yang sama sensitiviti umat Islam sentiasa dipelihara.

### **Metodologi Kajian**

Kajian ini menggunakan pendekatan kualitatif dengan memberi tumpuan terhadap pengkajian mendalam terhadap artikel-artikel yang membincangkan isu-isu berkaitan agama, terutamanya yang melibatkan interaksi antara agama Islam dan bukan Islam. Pengkajian ini bukan sahaja menyoroti isu-isu asas yang menjadi latar kepada hubungan antara masyarakat Muslim dan bukan Muslim, tetapi juga melihat kepada implikasi yang mungkin timbul sekiranya terdapat salah faham atau kekaburan dalam kalangan Muslim mengenai bagaimana mereka harus berinteraksi dengan komuniti agama lain dan dalam masa yang sama perlu memastikan hubungan yang dilakukan mestikan berasaskan parameter maqasid syariah. Ini termasuklah isu-isu yang menyentuh toleransi agama, pemahaman terhadap ajaran Islam dalam konteks sosial, serta cabaran yang dihadapi dalam memupuk hubungan yang harmonis antara pelbagai kelompok agama.

## Kajian Literatur

### Kerencaman Etnik dan Agama

Dianggarkan jumlah penduduk Malaysia sehingga Mei tahun 2024 adalah seramai 33.2 juta orang. Di Malaysia kelompok Muslim merujuk kepada Muslim asal iaitu Melayu, Melanau, India Muslim dan kelompok yang melakukan pemelukan agama Islam. Manakala kelompok non-Muslim merujuk kepada mana-mana kelompok yang menganut agama selain daripada Islam (Jabatan Perangkaan Malaysia, 2024). Kelompok Muslim membentuk sebanyak 61.34% dari jumlah keseluruhan penduduk, manakala kelompok bukan Muslim adalah penganut agama Buddha adalah sebanyak (19.8%), Kristian pula sebanyak (9.2%), Hindu (6.3%), Confucianism, Taoism, agama tradisional Cina (1.3%) dan lain-lain serta tidak diketahui status kepercayaan adalah sebanyak (2.1%) (Jabatan Perangkaan Malaysia, 2020). Setiap etnik di Malaysia dikenali dengan identiti yang tersendiri misalnya kelompok Melayu menggunakan bahasa Melayu dalam percakapan harian dan menganut agama Islam. Kelompok Cina lazimnya menggunakan bahasa mandarin (atau dialek sub etnik seperti hokien, kantonis dan sebagainya) dan kebanyakannya merupakan penganut agama yang dibawa dari tanah besar China iaitu Buddha, Confucianism, Taoism dan agama tradisional Cina. Masyarakat India lazimnya menggunakan bahasa Tamil dan kebanyakan daripada mereka merupakan penganut agama Hindu. Etnik-etnik di Sabah dan Sarawak merupakan kelompok bumiputera yang menggunakan bahasa yang pelbagai dan kebanyakan daripada mereka menganut agama Kristian (Azarudin, 2015). Apa yang pasti, kepelbagaian sebagaimana dinyatakan di atas bukan sahaja mencerminkan kekayaan budaya Malaysia, tetapi juga menekankan perlunya toleransi dan pemahaman antara kelompok etnik dan agama yang berbeza demi mewujudkan keharmonian dalam masyarakat yang berbilang agama.

### Interaksi Sosial

Tuntasnya, manusia merupakan makhluk yang bersosial yang menyebabkan hidupnya tidak akan sempurna tanpa kehadiran insan yang lain. Justeru, naluri manusia kerap kali ingin melakukan interaksi sosial dan kerjasama dengan manusia yang lain (Asrul, 2013). Interaksi sosial merupakan satu bentuk hubungan yang berlaku antara individu dengan individu, individu dengan satu kelompok manusia dan antara kelompok dengan kelompok yang lain. Interaksi sosial hanya akan terjadi apabila berlakunya komunikasi serta hubungan sosial sama ada secara langsung atau sebaliknya (Batinah et al., 2022). Wujud tiga unsur penting dalam memastikan agar interaksi yang berlaku sampai ke sasaran iaitu sumber maklumat, kaedah yang disampaikan dan penerima maklumat tersebut (Efendi, 2024).

Implikasi interaksi sosial menghasilkan pelbagai bentuk kerjasama, berlakunya pelbagai proses penyesuaian seperti akomodasi, asimilasi, akulturasi atau mungkin berakhirnya dengan konflik. Sewajarnya juga, sebarang permasalahan yang mendorong kepada konflik interaksi sosial dalam komuniti multi etnik seperti etnosentrik, salah faham terhadap nilai budaya orang lain, stereotype dan prasangka buruk perlulah dikikis dalam hubungan sosial. Justeru, proses tawar-menawar yang berlaku dalam interaksi sosial adalah satu usaha untuk membendung sebarang pergeseran dan konflik antara dua nilai yang berbeza (Asrul, 2013). Dalam merealisasikan interaksi sosial Muslim dan non-Muslim di Malaysia sedikit berbeza dengan negara-negara lain. Hubungan sosial yang berlaku antara komuniti Muslim dan bukan Muslim di Malaysia diasaskan kepada perlembagaan dan kontrak sosial (Khairul Azhar et al., 2020). Dapat dinyatakan bahawa keberhasilan interaksi antara kaum di Malaysia bergantung kepada pemahaman dan penghormatan terhadap perbezaan budaya dan nilai dalam kalangan kelompok

yang berbeza. Dengan mengutamakan dialog dan toleransi, masyarakat dapat mencapai keseimbangan dan mengelakkan konflik dalam konteks kepelbagaian yang ada.

### **Islam dan Interaksi Sosial**

Firman Allah dalam surah al-Hujurat ayat 13 yang bermaksud “*Wahai manusia! Sungguh, Kami telah menciptakan kamu dari seorang laki-laki dan seorang perempuan, kemudian Kami jadikan kamu berbangsa-bangsa dan bersuku-suku agar kamu saling mengenal*”. Berdasarkan ayat di atas, Allah menciptakan manusia daripada punca yang satu sehinggalah manusia berkembang dengan bangsa dan suku yang pelbagai yang tujuannya agar mereka ‘taaruf’ atau mengenali yang lain. Proses kenal-mengenal ini hanya berlaku melalui proses sosialisasi yang diperolehi melalui interaksi. Allah melarang manusia berbangga dengan nasab dan harta serta melakukan penghinaan kepada orang lain kerana semulia-mulia manusia disisinya adalah orang yang paling bertakwa (Al-Maraghi, 1993). Berdasarkan kenyataan di atas dapat dinyatakan bahawa interaksi sosial yang berlaku dalam kehidupan manusia perlulah merangkumi dua orang pelaku atau lebih, memiliki matlamat yang jelas, berlakunya hubungan timbal balik dan wujudnya kontak sosial antara pelaku.

Secara khusus Islam mengutarakan beberapa prinsip dalam merealisasikan hubungan sosial antara Muslim dengan bukan Muslim seperti menghormati prinsip kebebasan beragama (lihat al-Baqarah: 256), mengelakkan sebagai bentuk melampau (ekstremisme, chauvinisme dan fanatik), berinteraksi dengan ber hikmah. Berkait dengan ini juga, Khairul Azhar et al. (2020) memperhalusi prinsip interaksi sosial Muslim dengan bukan Muslim bahawa interaksi yang berlaku perlulah menghindari dari sebarang cemuhan budaya serta agama lain, perlu adanya toleransi antara penganut agama bagi mengelak sebarang bentuk konflik, memelihara kerukunan di antara umat beragama, memberi perhatian terhadap titik persamaan sepunya, dan nilai-nilai ajaran Islam menyentuh hubungan merentas agama.

### **Polemik Muslim dan non-Muslim Berkisar Isu Agama di Malaysia**

Menurut Siti Khatijah & Fadzli (2017), setelah negara berhadapan isu kewarganegaraan dan kontak sosial (1950-1960), isu bahasa (1960-1970) dan isu tentang kuota serta urbanisasi (1970-1980), negara berhadapan dengan isu yang menyentuh keagamaan bermula 1980-1990. Pergaduhan dan konflik antara komuniti Muslim dengan non-Muslim sekaligus menjadikan isu ini menjadi begitu sensitif dalam kehidupan masyarakat berbilang agama. Antara isu yang dipaparkan ialah bacaan dan aktiviti dalam masjid, dan laungan azan menimbulkan rasa kurang selesa dalam kalangan non-Muslim yang tinggal berhampiran dengan masjid atau surau. Untuk tahun-tahun berikutnya (1990-2010), perihal yang sama diluahkan oleh komuniti non-Muslim terhadap penggunaan pembesar suara di masjid dan surau khususnya kuliah/ceramah agama dilangsungkan. (Ab. Aziz et al., 2008). Selanjutnya, Zaid et al. (2014) mendapati antara isu yang muncul 2010-2020 ialah isu hak penjagaan anak mualaf, isu penghinaan terhadap agama, isu tuntutan mayat, persoalan tentang Malaysia negara Islam atau sekular, isu tentang hudud, isu tapak rumah ibadat, bidang kuasa Mahkamah Sivil dan Mahkamah Syariah, pertukaran agama, isu kalimah Allah dan isu penyebaran Islam kepada agama lain.. Selain itu terdapat isu-isu agama yang menyentuh hubungan sosial Muslim dan non-Muslim di Malaysia, antara mendoakan bukan Muslim, bukan Muslim memasuki masjid, meraikan upacara keagamaan orang lain dan pemakaian simbol agama lain. Justeru Farhana & Nur Syahirah (2020) berpandangan kemunculan isu-isu sensitiviti agama ini menjadi salah satu faktor yang menyumbang kepada keruntuhan keharmonian dalam kehidupan masyarakat. Berdasarkan kenyataan di atas, isu-isu berkaitan agama semakin menonjol dalam hubungan antara Muslim dan non-Muslim di Malaysia sejak 1980-an, bermula dengan permasalahan berkaitan masjid



dan azan, hingga kepada isu yang lebih kompleks seperti hak penjagaan anak mualaf, tuntutan mayat, dan perdebatan mengenai status Malaysia samada negara Islam atau sekular. Isu-isu ini terus mempengaruhi keharmonian sosial, dengan sensitiviti terhadap simbol dan amalan agama yang berpotensi merosakkan hubungan antara komuniti.

### **Parameter Interaksi Sosial Muslim dan non-Muslim**

Dalam Kamus Dewan (2015), parameter dijelaskan sebagai ukur keliling atau sempadan sesuatu kawasan. Seorang Muslim perlulah menjalani kehidupannya berdasarkan sempadan-sempadan yang digariskan oleh ajaran agama. Manusia sebagai makhluk sosial mempunyai peranan-peranan dalam kehidupan yang salah satunya adalah interaksi sosial antara manusia yang lain sama ada di dalam kelompok atau di luar lingkungan masyarakat. Interaksi sosial juga merupakan hubungan yang dinamis iaitu hubungan ini berkaitan dengan hubungan antara individu, antara kelompok, ataupun hubungan individu dan kelompok sekaligus (Idrus et al., 2023). Namun, interaksi sosial yang dimaksudkan di sini sebagai pengaruh timbal balik antara dua belah pihak, iaitu antara individu dengan individu, antara individu dengan kelompok dan; antara Muslim dan bukan Muslim dalam rangka mencapai tujuan tertentu. Timbul sesuatu perkara yang agak kabur apabila masyarakat Muslim melakukan suatu amalan diluar kelazimannya sama ada ianya dibenarkan atau tidak misalnya dalam perkara yang melibatkan aspek-aspek 'meraikan sambutan perayaan dan kebudayaan bukan Muslim'. Justeru parameter merupakan satu garis panduan bagi umat Islam untuk melibatkan diri dalam sambutan perayaan dan kebudayaan bukan Muslim agar aktiviti yang diikutinya tidak menyebabkan dirinya tergelincir dari ajaran dan syariat Islam. Hashim et al. (2023) menyatakan bahawa pelaksanaan terhadap amalan dalam kehidupan dengan betul yakni merealisasikan praktis kehidupan berasaskan akidah, syariat dan akhlak yang betul berupaya memperteguhkan jati diri insan Muslim. Dapat dinyatakan bahawa dengan mengikuti parameter yang ditetapkan, individu Muslim mampu mengekalkan jati diri agama khususnya apabila melakukan kolaborasi sosial khususnya dengan masyarakat yang berbilang agama.

### **Peranan Maqasid Syariah Dalam Hubungan Antara Agama**

Maqasid adalah kata jamak daripada maqsad dan maqsid (المقصد) yang berasal dari perkataan qasada (قصد) dalam bahasa Arab, yang bermaksud menuju ke suatu arah. Sementara itu, syariat membawa maksud tempat terbit air yang menjadi sumber minuman, jalan, apa yang disyariatkan Allah dari aspek akidah dan hukum, agama, serta pandangan mazhab yang jelas (Ibnu Asyur, 2001). Maqasid syariah, atau tujuan syariah, adalah konsep dalam hukum Islam yang menekankan pada tujuan-tujuan fundamental dari hukum Islam untuk melindungi dan mempromosikan kesejahteraan umat manusia. Dalam konteks hubungan antara agama, maqasid syariah memainkan peranan penting dalam memastikan harmoni, toleransi, dan ko-eksistensi yang damai antara berbagai kelompok agama untuk hidup bersama. Dari sudut pengamalan agama, maqasid syariah menekankan pentingnya menjaga kebebasan beragama dan menghormati keyakinan setiap individu. Ini bererti bahawa setiap orang harus memiliki hak untuk memilih dan menjalankan agamanya tanpa paksaan atau diskriminasi Dalam konteks memelihara jiwa, Islam menghindari sebarang bentuk kekerasan dan mempromosikan perdamaian serta keselamatan bagi semua umat manusia, tanpa memandang agama mereka. Selain itu, bagi mempromosikan kedamaian hidup Islam menghargai pengetahuan dan kebebasan berpikir. Justeru, menggalakan dilakukan dialog antara agama dilaksanakan dengan cara yang sihat dan saling menghormati bagi mempromosikan pemahaman dan toleransi yang lebih baik. Dalam memelihara keturunan pula, Islam menghormati kahwin campur dengan syarat pasangan perlu menganut agama Islam dan hak-hak anak dari pernikahan tersebut dipelihara, serta memastikan bahawa keluarga dapat hidup harmonis dalam lingkungan

perbezaan hubungan antara agama dan budaya. Dari aspek harta pula, Islam mempromosikan keadilan social dan memberi jaminan kepada masyarakat non-Muslim untuk memiliki dan menguruskan harta tanpa sebarang diskriminasi (Khadijah, 2020). Tuntasnya, maqasid syariah mendukung hubungan yang damai dan harmonis antara berbagai kelompok agama. Ini mengharuskan umat Islam untuk menghormati dan melindungi hak-hak individu dari agama lain, serta menyumbang kepada terciptanya masyarakat yang adil dan damai.

### **Realistik Parameter Interaksi Sosial Muslim-non-Muslim di Malaysia**


Kemakmuran dan kerukunan hidup majmuk di Malaysia diserlahkan melalui kegiatan gotong royong, ziarah menziarahi dan; meraikan sambutan perayaan dan kebudayaan merentas etnik. Lazimnya komuniti Cina di Malaysia menyambut perayaan Tahun Baru Cina, Chap Goh Meh, Hari Wesak, meraikan tarian singa, tarian naga dan sebagainya. Masyarakat India yang beragama Hindu pula akan meraikan sambutan perayaan Deepavali, Thaipusam, pesta ponggal dan sebagainya. Bagi komuniti di Sabah dan Sarawak khususnya yang beragama Kristian, selain meraikan hari Natal, mereka juga meraikan pesta keamatan dan hari gawai. Perpaduan kaum dan kemesraan ini diserlahkan lagi apabila mereka menjemput rakan-rakan Muslim, jiran tetangga dan kaum kerabat yang Muslim (mualaf) untuk meraikan bersama-sama perayaan dan kebudayaan yang diwarisi sejak berzaman lagi (Mohd Rosli Saludin et al., 2023).

Komuniti Muslim di Malaysia terdiri daripada pelbagai latar belakang pendidikan dan tahap pengetahuan agama yang berbeza-beza. Malah terdapat kelompok yang 'baharu' memeluk agama Islam yang amat memerlukan dorongan agar mereka dapat menghayati agama Islam yang sebenarnya. Dalam masa yang sama, kelompok ini juga perlu meraikan budaya-budaya asal agar tohmahan dan tuduhan bahawa penganut agama yang baru ini memisahkan dan memencilkan diri daripada komuniti asal adalah tidak benar (Azarudin et al., 2023). Mengambil kira terdapat kelompangan pengetahuan agama tentang batas-batas meraikan perayaan dan kebudayaan bukan Muslim dalam kalangan masyarakat Muslim di Malaysia, menyebabkan tanpa disedari mereka terjerumus kepada penyelewengan akidah. Al-Quran dalam surah al-kafirun menjelaskan secara tegas agar umat Islam tidak melibatkan diri secara sewenang dalam perihal sambutan ritual keagamaan orang lain (Nur Mohammad et al., 2019).

Toleransi Islam bukan bermakna Islam boleh menerima, menyerap atau berkongsi aspek-aspek kepercayaan orang lain. Kurang mengetahui, memahami dan salah faham terhadap konsep toleransi beragama dalam Islam yang sebenarnya merupakan antara faktor komuniti Muslim mengambil mudah meraikan perayaan dan kebudayaan yang dilihat bertentangan dengan ajaran agama dan norma kehidupan masyarakat Muslim. Ini termasuklah melibatkan diri dalam upacara ritual agama dalam urusan pengkebumian, melakukan penyembahan atau tunduk kepada sesuatu objek, mempercayai tentang ramalan dalam agama tersebut dan melakukan ucapan yang membesarkan agama tersebut (Abdul Halim & Unggun Tiara, 2019). Kecurangan dan salah laku terhadap agama Islam dalam kalangan umat Islam sendiri menimbulkan rasa kurang senang dalam kalangan masyarakat Muslim yang lain dan sekaligus menjatuhkan imej dan martabat agama Islam itu sendiri.

Dalam keadaan tahap pengetahuan agama yang berbeza-beza dalam kalangan umat Islam di Malaysia, sedikit sebanyak membentuk interpretasi yang pelbagai terhadap paradigma hubungan sosial merentasi agama dan budaya. Apatah lagi sumber-sumber yang kadang kala 'kurang muktabar' menjadi bahan rujukan dalam kalangan masyarakat Islam untuk menghalalkan cara.. Terdapat beberapa kajian lepas yang menyentuh perkongsian perayaan dan kebudayaan yang dilakukan di Malaysia. Antaranya kajian yang dilakukan oleh Cristina Andin

et al. (2022) dalam kajian perayaan-perayaan di Sabah mendapati bahawa sambutan perayaan dan kebudayaan boleh mempengaruhi sikap, norma subjektif dan persepsi tentang cara seseorang menangani toleransi antara etnik. Menurut Khadijah et al. (2017), Islam merupakan agama yang mementingkan kerukunan dan toleransi sesama manusia yang diserlahkan melalui kegiatan sambutan perayaan, melakukan kunjungan ziarah dan menghormati budaya rakan yang berbeza agama. Manakala kajian yang dilakukan oleh Mohd Faqih dan Zuliza (2021) pula mendapati tiga jenis interaksi yang berlaku dalam kalangan komuniti Muslim baharu ketika menyambut perayaan Deepavali bersama keluarga asal iaitu melibatkan diri sepenuhnya, hanya melakukan ziarah dan kelompok meninggalkan sepenuhnya perayaan tersebut. Signifikan parameter hubungan sosial Muslim dengan non-Muslim boleh diperhatikan sebagaimana gambarajah di bawah:



**Gambarajah 1 : Signifikan Parameter Interaksi Sosial Meraikan Perayaan Non-Muslim**

### Kesimpulan

Perayaan memainkan peranan penting dalam memperkukuhkan perpaduan di Malaysia. Rakyat Malaysia yang berbilang agama berpeluang untuk memahami dan menghormati budaya dan kepercayaan komuniti lain. Berkongsi makanan khas perayaan dan mengambil bahagian dalam tradisi perayaan membantu membina ikatan yang lebih erat antara masyarakat yang berbeza. Keterlibatan dalam perayaan nasional dan majlis perayaan pelbagai kaum menyumbang kepada pembentukan identiti nasional yang unik dan harmoni. Namun begitu, kewaspadaan dalam menyambut perayaan bukan Muslim adalah penting bagi umat Islam untuk memastikan mereka tetap teguh dalam akidah, menghormati panduan agama, mengelakkan konflik sosial, menjaga perpaduan ummah, dan menghormati sensitiviti agama

Pembangunan parameter interaksi sosial Muslim dalam meraikan sambutan perayaan dan kebudayaan bukan Muslim di Malaysia menjadi panduan kepada umat Islam di Malaysia untuk menyantuni mereka sebagaimana yang dikehendaki oleh syariat. Sekaligus, parameter yang dibangunkan ini mampu menyelamatkan akidah umat Islam dan dalam masa yang sama ia mampu mengekalkan keharmonian kaum melalui aktiviti interaksi sosial rentas agama dan budaya.



## Penghargaan

Penyelidik ingin merakamkan ucapan terima kasih kepada FRGS/1/2023/SS10/UITM/02/26 di bawah Kementerian Pengajian Tinggi dan 600-RMC/FRGS 5/3 (053/2023) di bawah Universiti Teknologi Mara kerana menyediakan dana untuk penyelidikan yang dijalankan

## Rujukan

- Ab. Aziz Mohd Zin, Faisal Ahmad Shah, Mariam bt. Abd Majid & Mohd Makhi b. Adnan. (2008). Perasaan orang bukan Islam terhadap laungan suara, bacaan dan aktiviti masjid di Negeri Selangor Darul Ehsan. *Jurnal Usuluddin* 27, 109-119.
- Abdul Halim dan Unggun Tiara Shahriana. (2019). Keikutsertaan Masyarakat Muslim Dalam Upacara Tiwah Agama Hindu Kaharingan di Kota Palangka Raya. Al-Qisthu: *Jurnal Kajian Ilmu-Ilmu Hukum*, 17 (2), 34-42.
- Al-Maraghi, Ahmad Mushthafa. (1993). *Tafsir Al-Maraghi*. 2nd ed (Terj.). Semarang: Semarang: CV. Toha Putra.
- Asrul Muslim. (2013). Interaksi Sosial Dalam Masyarakat Multietnis. *Jurnal Diskursus Islam* 1 (3), 483-494.
- Azarudin Awang, Azman Che Mat, Razali Musa & Ruhaizah Abd. Ghani. (2023). The Effects of Islamic Education on Religiosity Among Muallaf Students in Malaysia. *Journal of Nusantara Studies* 81(1), 290-309.
- Azarudin Bin Awang. (2015). Kajian Pengalaman Dialog Kehidupan Masyarakat Cina Muslim Terengganu Sebelum dan Selepas Konversi. Tesis PhD UM
- Batinah, Arum Meiranny dan Atika Zahria Arisanti. (2022). Faktor-Faktor Yang Mempengaruhi Interaksi Sosial Pada Anak Usia Dini:Literatur Review. *Oksitosin: Jurnal Ilmiah Kebidanan*, 9(1), 31-39.
- Christina Andin, Rosazman Hussin & Johan Johnes. (2022). Toleransi Etnik Melalui Perayaan Orang Asal di Sabah: Aplikasi Teori Tingkah Laku Terancang. *e-Bangi, Journal of Social Sciences and Humanities*. 9 (6), 195-214.
- Efendi, E., Akbar, A., Madani, A. L., Zahra, L. A., Nst, M. S. A. G., & Ramadhan, U. F. (2024). Analisis Unsur-unsur Komunikasi, Media Komunikai, Metode Komunikasi, Efek Komunikasi. *Da'watuna: Journal of Communication and Islamic Broadcasting*, 4(3), 1293-1300.
- Hashim, N. M., Rani, M. A. M., Ishak, A. H., & Saman, S. W. M. (2023). Kelestarian Jati Diri Muslim Mualaf: Kajian Kes Di Hidayah Centre Shah Alam. *International Journal of Social Science Research*, 5(1), 16-23.
- Ibn Asyur, Muhammad Al-Tahir, (2001). *Maqasiq As-Syari'ah Al-Islamiah*, Oman: Dar Al-Nafais Nisar.
- Idrus, N., Lestari, S., Nuraini, N., Mukramin, S., & Kameliyani, K. (2023). Interaksi Sosial Pendidikan dalam Pembelajaran Online. *Journal on Education*, 5(2), 5403-5412.
- Laporan Taburan dan Ciri-ciri Demografi Asas 2020**. Jabatan Perangkaan Malaysia. 14 Februari 2020. Diarkibkan daripada yang asal pada 22 Ogos 2023. Dicapai pada 26 Jun 2024
- Kamus Dewan*. (2015). Kuala Lumpur: Dewan Bahasa & Pustaka.
- Khadijah Mohd Khambali @ Hambali. (2020). Kepelbagaian dan Kesatuan Dalam Konteks Fiqh al-Ta'ayush di Malaysia Menurut Perspektif Pemikiran Islam. *Jurnal Al-Afkar*, 22(1), 73-102.
- Khadijah Mohd Khambali, Azarudin Awang, Suraya Sintang, Nur Farhana Abdul Rahman, Wan Adli Wan Ramli & Khairul Nizam Mat Karim, (2017) *Muhajir Penjana Interaksi dan Toleransi Beragama Saudara Baru-Muslim-non-Muslim*. *AKADEMIKA*, 87 (2), 63-76.

- Khairul Azhar Meerangani, Muhammad Ikhlas Rosele dan Syamsul Azizul Marinsah. (2020). *Pendekatan Wasatiyyah Dalam Interaksi Inter-agama Di Malaysia Wasatiyyah Approach In Inter-religious Interaction In Malaysia*. *MANU*, 2, 19-46.
- Mohd Faqih Baharudin & Zuliza Mohd Kusrin. (2021). Interaksi Muafak India dengan Keluarga Bukan Islam Ketika Sambutan Perayaan Agama Hindu. *ISLĀMIYYĀT* 43(1), 73-84.
- Mohd Rosli Saludin, Mohd Nasir Saludin, Fazurah Mustaffa. (2023). Amalan-Amalan Adat Di Port Dickson. *Jurnal Tuah* 3 (1), 93-109.
- Mohd Rus Yunus & Zulfaqar Mamat (2017). Merayakan Hari Kebesaran Agama Orang Bukan Islam Menurut Perspektif Islam. *Jurnal Penyelidikan Islam*, 2, 83-93
- Nur Mohammad Hadi Zahalan, Meryem Abousb, Ahmad Syukran Bharuddina. (2019). Hubungan Kemasyarakatan Muslim dengan Non-Muslim Mengikut Perspektif Maqasid Syariah di Malaysia: Relationship Community of Muslim and Non-Muslim According to the Perspective of Maqasid Shariah in Malaysia. *'Abqari Journal*, 20(1), 67-77.
- Nur Farhana Abdul Rahman & Nur Syariah Muhammad Shah. (2020). Persepsi Penganut Muslim dan bukan Muslim terhadap Isu-Isu Sensitif Agama: Kajian di Lembah Klang. *International Journal of Islamic Thought* 18 (0), 95-109.
- Perangkaan Demografi Malaysia Suku Pertama 2024. Jabatan Perangkaan Malaysia. <https://www.infoupu.com/jumlah-penduduk-malaysia/#:~:text=Statistik%20Terkini%20%E2%80%9CMalaysia%20Population%E2%80%9D%20Mengikut%20Aspek%202024%20vs%202023&text=Warganegara%3A,2024%20%3A%2030.6%20juta>. Diakses pada 5 Ogos 2024
- Salihah Ali, Mohd. Isa Hamzah, Maimun Aqsha Lubis, Eka Yusnaldi, M.Pd., Ikwana Lubis SE, MM, Siti Hajar Taib. (2021). Prinsip Toleransi Islam Dalam Menangani Konflik Kepelbagaian Kaum Di Malaysia. *ASEAN Comparative Education Research Journal on Islam and Civilization (ACER-J) Volume 4(2)* September 2021, 142-168.
- Siti Khatijah Yasin & Fadzli Adam. (2017). Sensitiviti Agama dalam Hubungan Masyarakat Pelbagai Kaum di Malaysia. Kertas kerja *Proceedings of International Conference of Empowering Islamic Civilization*. Institut Penyelidikan Produk dan Ketamadunan Melayu Islam, Universiti Sultan Zainal Abidin, Terengganu, 7-8 October.
- Zaid Ahmad, Ahmad Tarmizi Talib, Nur Ayuni Mohd Isa, Gill. S. S., Jayum Jawan & Abd Hakim Mohad. (2014). Kertas kerja *Regional Seminar on Da'wah and Ethnicity: Da'wah & Ethnicity: Multidisciplinary Perspective*. Pusat Kajian Dakwah Orang Asli dan Pribumi UKM, Universiti Malaysia Sabah, Sabah, 20-21 November.
- Zuhainy Zulkiffli. (2021). Usah Besarkan Isu Penuntut Uia Bersihkan Kuil Hindu - Mufti Pulau Pinang. <https://www.hmetro.com.my/mutakhir/2021/12/793367/usah-besarkan-isu-penuntut-uia-bersihkan-kuil-hindu-mufti-pulau-pinang>. Di Akses pada 3 okt. 2024.